

四庫全書

子部

欽定四庫全書

寶賓錄卷八

宋 馬永易 撰

人中龍

後漢蔡邕題曹娥碑背曰黃絹幼婦外孫齏臼曹公與楊修讀之問曰解否答曰解公令脩勿語待吾思行三十里方解乃歎曰有智無智較三十里後乃殺脩操諸子皆救公曰此是人中龍恐非汝能駕馭遂殺之碑背八字蓋謂絕妙好辭也

一龍

魏華歆與邴原管寧俱遊學相善時人號三人為一龍歆為龍頭原為龍腹寧為龍尾

二龍

四則

漢許劭汝南平輿人與兄度俱知名汝南人稱平輿淵有二龍焉今豫州汝陽縣東北有二龍鄉月旦里

按豫州今

本漢書許劭傳注作豫章據郡國志所載汝陽縣屬豫州若豫章自隸揚州實賓錄所引可正今本漢書之誤

柳惔工製文少與長兄悅齊名世隆之子也王儉謂人

曰柳氏二龍可謂一日千里

梁建安王為雍州刺史表求江革為征北記室叅軍弟  
觀為征北行叅軍沈約任昉與革書曰此段雍府妙選  
英才文房之職總卿昆季可謂馭二龍於長途騁騏驎  
於千里

五代南唐徐鉉稟性真純顧視差近釋褐之初嘗與弟  
鍔謁宰相孫晟晟曰徐氏二龍信為名士然厥兄頗似倨  
傲以此少之久而方知其端謹大加器重

雙龍

晉二陸制曰穴碎雙龍巢傾兩鳳

三龍

則二

蜀李劭字永南兄朝字偉南又有一弟早亡各有才望  
時人號之李氏三龍

虞綸字孝序兄弟俱有譽於當時謂之三龍

四龍

則四

後漢李元禮祖父脩安帝時為尚書生四子亮叔訓季

皆為牧守號曰四龍

南燕房堪後漢尚書令植八代孫也為廣平太守慕容德時家濟南生四子豫坦邃熙號四龍

唐楊炎為范陽大都督忠烈李公神道碑云公諱楷本出隴西八代祖節後魏雁門太守公禦戎安邊動罔不濟元子太尉中書令臨淮郡王光弼少子太保御史大夫武威郡王光進名一門四龍二作元老

唐張從申尤善真行書握管用筆其於結字緊密近古

未有弟從師從義從約並工書皆得右軍風規人謂之  
四龍

五龍

二則

重合令子興居宋里櫟陽令子羽居東觀里東海太守  
子仲居宜唐里兗州刺史子明居西商里潁陽令子良  
居遂興里郡決曹掾汝南周燕少卿之五子號曰五龍  
各居一里子孫並以儒素退讓為業

辛攀兄弟五人並有才識秦雍為之語曰五龍一門金

枝玉昆

八龍

荀儉字伯慈儉弟緄字仲慈緄弟靖字叔慈靖弟壽字  
慈光壽弟汪字孟慈汪弟爽字慈明爽弟肅字敬慈肅  
弟粦字幼慈朗陵令潁川荀季和之八子並有德業時  
人號之八龍

十龍

魏張魯有十子第二子廣清淨退默仕至金城太守第



五子文法度清敏兼美容儀武帝因文謂魯曰卿積善之家足以有餘慶時人為之語曰張氏十龍儒雅溫恭

卧龍

三則

晉習鑿齒二舅羅果羅友相繼為襄陽都督鑿齒與弟秘書曰每定省家舅從北門入西望隆中想卧龍之吟東眺白阿思鳳雛之聲北臨樊墟存鄧老之高南眷城邑懷羊公之風

晉庾亮在江州聞翟湯之風東帶躡屐詣焉湯見亮備

主客之禮甚恭亮怪曰君道高世表僕敢忘其恭耶湯曰使君忽敬其枯木朽株耳亮服其言語主簿張湛曰此卧龍不可動也

唐侯潮累遷中書舍人僖宗幸蜀擢學士後辭職隱導

江別業號卧龍館

按蜀志諸葛亮傳徐庶謂先主曰諸葛孔明者卧龍也卧龍字始此疑實

賓錄原有此文而太典偶失載者附記于此

### 火龍子

後唐太祖嘗隨衆征龐勛臨陣出沒如神號為火龍子

新書一云龍虎子

釋奴龍子

北齊盧昌衡小字龍子沉靖有才識風神澹雅容止可  
法博經史工草行書從弟思道小字釋奴宗中稱英妙  
昌衡與之俱被推重故幽州為之語曰盧家千里釋奴  
龍子

潛龍

後漢馬畧年十七閉室讀書九年不出三日一食繼命

而已鄉里謂之潛龍年三十拜闕內侯光州刺史棄官入海惡蟲猛獸見悉避路

不睡龍

五代吳越錢鏐少在軍中未嘗寢未年少倦乃刻木為枕以自警或命諸孫諷詩以達旦既薨晉天福中契丹使至朝廷以近侍李泳為監伴使敵有判官者幽薊人謂泳曰吳越王日常不睡乎泳詰其故對曰常聞五臺山王子太師言浙中不睡龍今已歸矣訪所聞乃長興

王辰之後也

海龍王

後唐吳越王錢鏐分兩浙為數鎮功臣諸子皆領節制授而後請命子孫甥姪軒陞服飾窮極侈靡吳人號為海龍王

土龍乞雨

後魏劉獻之雅好讀書時有從其學者獻之輒曰人之立身要以德行為首子若出孝入悌忠信仁遜不待出

戶天下自知儻不能然則雖下帷針股躡屨從師止可  
博聞多識不過為土龍乞雨眩惑將來其於立身之道  
有何益哉

### 兩虎

梁韋叡攻魏合肥下之初右軍司馬韓景畧與前軍趙  
祖悅同軍交惡志相陷吞景畧一怒自齧其齒齒皆流  
血叡以將帥不和將致患禍酌酒自勸景畧曰且願兩  
虎勿復私鬪故終於此役得無害焉

白虎王

枝江縣有陳留王子香廟子香漢和帝時為荊州刺史有惠政天子召之道卒枝江亭中嘗有三白虎出入人間送喪踰境百姓追美設祠立石銘德號曰枝江白虎王今猶謂之白虎王

虎子

二則

吳凌統為將既卒二子列封年各數歲權內養於宮愛與諸子同凡賓客進見呼示之曰此吾虎子及八九歲

教之讀書十日一令乘馬

吳越杜建徽稜子也治軍嚴整累從征伐未嘗介甲所至輒有功軍中謂之虎子也

飛虎子

唐李克用年十五從征摧鋒陷陣出諸將之右軍中目為飛虎子

熊虎

三則

吳周瑜初劉備領荊州牧治公安備詣京見孫權瑜上



疏曰備以梟雄之姿而關張熊虎之將必非久屈為人  
用者徒備置吳盛為築宮室多其美女玩好以娛其耳  
目此二人各置一方使如瑜者得挾與攻戰大事可定  
今猥割土地以資業之聚此三人俱在疆場恐蛟龍得  
雲雨終非池中物也

吳魯肅代周瑜當之陸口過呂蒙蒙曰君受重任與關  
羽為隣將何計畧以備不虞肅造次應曰臨時施宜蒙  
曰今東西雖為一家而關羽實熊虎也計安可不豫定

因為肅畫三策

唐王峻氣貌偉特時謂為熊虎相感慕節義有古人風

飛豹

晉王彌有才幹博涉書記少遊俠京師隱者董仲道見之曰君豺聲豹視好亂樂禍若天下騷擾不作士大夫矣及入長廣山為盜弓馬迅捷膂力過人青土號為飛豹

清河騏驎

魏管輅清河太守華表召為文學掾安平趙孔曜薦輅於冀州刺史裴徽曰清河郡有一騏驎拘繫後廐歷年去王良伯樂百八十里不得騁天骨起風塵徽言騏驎何在孔曜曰平原管輅雅性寬大與世無忌仰觀天文則妙同甘公俯覽周易則齊思季主由是召為文學從事一見清論終夕再見轉為鉅鹿從事三見轉治中四見轉別駕

按輅本傳年四十七卒自言無祿命相過此當得別駕說與此文相反

驥子龍文

北齊裴景鸞景鴻河東聞喜人並有逸才河東呼景鸞  
為驥子景鴻為龍文

千里駒

三則

前趙劉曜元海族子也八歲從元海獵于西山遇雨止  
樹下迅雷震樹旁人莫不顛仆曜神色自若海曰此吾  
家千里駒

宋丘仲孚少好學讀書嘗以中宵鍾鳴為限從祖靈鞠  
有人倫鑒每稱之曰此千里駒也

唐宗室仁鬱林王恪長子也嘗使江左州人遺以金拒  
不納武后遣使勞曰兒吾家千里駒更名千里

驎駒鳳雛

漢董卓孫年七歲愛以為己子作鎧冑使騎馱馬玉  
軸一具出入以為驎駒鳳雛

白馬生

後漢張湛光武時拜光祿勳湛在鄉黨時詳言正色三  
輔以為儀表或謂湛詐偽聞而笑曰我誠詐也人皆詐

惡我獨詐善不亦可乎光武臨朝或有情容湛輒陳諫

其失常乘白馬帝每見湛輒言曰白馬生且復諫矣

案大

典所錄此段至不亦可乎止與實賓錄書意未協今據後漢書本傳增入數語

### 黃驄年少

後魏裴果為陽平郡丞永安末盜賊蜂起果從征討乘黃驄馬衣青袍每先登陷陣時人號為黃驄年少

### 鬱屈蜀馬

唐郎中張元一以唐波若矮短目為鬱屈蜀馬

赤馬將軍

唐李國昌所乘馬號胡孫赤戎人見之曰吾軍見赤馬將軍火生頭上

栗犢

漢長安有儒生曰惠莊聞朱雲折五鹿充宗之角乃嘆曰栗犢反能爾耶吾終耻溺死溝中遂累糧從雲雲與言莊不能對遂巡而去拊心謂人曰吾口不能劇談此中多有

閣道大牛

晉潘岳為河陽令負其才而鬱鬱不得志尚書僕射山濤領吏部王濟裴楷等並為帝所親遇岳內非之乃題閣道為謠曰閣道東有大牛王濟鞅裴楷韜和嶠刺促不得休

千斤牯特捲角牯

晉明帝問伯仁真長何如人答曰故是千斤牯特王公笑其言伯仁曰不如捲角牯有盤辟之好註云以戲王



也

太牢公

唐牛僧孺任戶部侍郎見李德裕曰綺紈子安得預此  
由是李深怨之交相詆惡甚至斥僧孺為太牢公德裕  
作周秦行紀論云梁國李逢吉呼僧孺曰太牢公

青牛師

後漢封衡字君達方士也幼學道通老莊之書勤訪真  
訣能行容成御婦人術愛嗇精氣不極視大言號青牛

師

五穀

漢揚雄解嘲曰五穀入而秦喜樂穀出而燕懼註曰五穀謂百里奚也買以穀羊之皮五故稱五穀

牂羊穀癪

魏焦先隱居人以為狂時大發卒將伐吳有問先今討吳何如先不肯應而謬歌曰祝魴祝魴非魚非肉更相追逐本為當殺牂羊更殺其穀癪邪郡人不知其所謂

會諸軍敗好事者乃推其意疑牂羊謂吳殺獬豸謂魏也  
三羊五馬

龐巨昭精天文緯候之學或問湖南淮南國祚長短巨  
昭曰吾聞童謡曰三羊五馬馬子離羣羊子無舍馬氏當  
五主楊氏當三主後如其言

山鹿野麋

晉陸雲與荀隱素未相識嘗會張華坐華曰今日相遇  
可勿為常談雲因抗手曰雲間陸士龍隱曰日下荀鳴

鶴鳴鶴隱字也雲又曰既開青雲睹白雉何不張爾弓  
挾爾矢苟未答華曰苟何遲應聲曰本謂是雲龍駢駢  
今乃是山鹿野麋獸微弩强是以發遲華撫掌大笑

### 驢王

後魏元坦一名穆傲佷凶麤從叔安豐王延明每切責  
之曰汝兒悖性與身而長昔宋有東海王禪志性凡劣  
時人號曰驢王我熟觀汝所作亦恐不免驢號當時聞  
者號為驢王

夏侯驢子

唐夏侯藉學吟詩入西川依託勲臣為幕下從事時人號為夏侯驢子言其鄙也

麒麟楨

唐衢州盈川縣令楊炯詞學優長恃材簡倨不容於時每見朝官目之曰麒麟楨人問其故楊曰今假弄麒麟者刻畫頭角修飾皮毛覆之驢上巡場而走及脫皮褐還是驢馬無德衣朱紫者與覆麒麟皮何以異聞者不平

故為時所忌

鄒駱駝

唐西京富商鄒鳳熾肩高背曲有似駱駝時人號為鄒駱駝其家巨富金寶不可勝計嘗因嫁女邀諸朝士賓客數千夜擬供帳備極華麗及女郎將出侍僕圍繞綺羅珠翠垂釵曳履尤艷麗者至數百人衆皆愕然不知誰是新婦

郭橐駝

唐郭橐駝不知始何名病僂隆然伏行有類橐駝者故鄉人號之橐駝駝聞之曰甚善名我固當因捨其名亦自謂橐駝云善種樹所種或移徙無不活且碩茂蚤實以蕃有問之對曰橐駝非能使木壽且孳也以能順木之天以致其性焉爾

王駱駝

五代蜀龍州軍事判官王延鎬頗然而長書札飲博觸事不能時號王駱駝

望柳橐駝

唐天官侍郎吉瑣長大好昂頭行視高而望遠郎中張元一目之為望柳橐駝

鄧駝子

五代湖南進士鄧洵美少嗜學為文典麗而貌陋背偃時人謂之鄧駝子言其狀如駝子負物也

鼉精

晉郭璞性放散不脩威儀為佐著作後轉王敦記室參



軍敦謀逆而為敦所害有人見其睡形變鼉云鼉精也

大蟲

二則

五代後蜀張洪從孟知祥入蜀屢有戰功強勇猛厲軍中號為張大蟲

五代楚李瓊有戰功討平桂林瓊魁岸力多每食肉十斤餘踞案大嚼耿耿然軍中號曰李大蟲先是桂林兒童聚戲衢路忽相驚走曰大蟲來至是果應

豬突豨勇

漢王莽既僭位盜賊蜂起大募天下丁男及死罪囚吏民奴名曰豬突豨勇以為銳卒本傳豬性觸突取以為喻東方名豕曰豨一曰豨豕走也

### 封豕

左傳魯昭公二十八年叔向母曰昔有仍氏黜黑而甚美光可以鑑名曰玄妻樂正后獲取之生伯封實有豕心貪恠無厭忿類無期謂之封豕

### 豬王

宋前廢帝子業狂悖無道誅害羣公忌憚諸父並聚之  
殿內毆箠陵曳無復人理建安王休仁及明帝山陽王  
休祐形體並肥帝乃以寵盛之以明帝尤肥號為猪王  
休仁為殺王休祐為賊王東海王禕尤凡劣號之為驢  
王明帝踐祚亦以禕類驢改封為廬陵王

黃麋漢

唐趙仁獎河南人也裨販于殖業坊王戎墓北善歌黃  
麋與宦官有舊因所託附景隆中乃負薪詣闕遂得召

見云負薪助國家調鼎即日拜監察御史睿宗朝左授  
上蔡丞使于京中書令姚崇曰此是黃麋漢耶授當州  
悉當尉仁獎本在臺既無餘能以黃麋自銜宗務光題  
曰趙獎出王戎墓下入朱博臺中捨彼負薪登茲列宿  
行人不避驄馬坐客惟聽黃麋

沐猴而冠

漢韓生說項羽都關中羽曰富貴不歸故鄉如衣錦夜  
行韓生曰人謂楚人沐猴而冠果然羽聞之斬韓生

獼猴面

後魏宋遊道剛直使氣時人語曰遊道獼猴面陸操科斗形意識不關見何謂醜者必無情

獼猴騎土牛

魏南陽州泰善用兵為宣王所知泰頻經考妣祖喪宣王留缺待之至三十六日擢為新城太守宣王為泰會使尚書鍾繇調泰君釋褐登宰府三十六日擁麾蓋守兵馬郡乞兒乘小車一何駛乎泰曰誠有此君名公之子

少有文采故守吏職獼猴騎土牛又何遲也衆賓咸悅

原註鄧艾  
傳作周泰

### 劉黑獼

五代江南劉鄂好學博貫羣籍體貌瘠黑號為劉黑獼  
或被襴襜又謂之白雲抱幽石

### 屠猓子

晉王珍與劉曜攻陷京邑遷帝平陽珍謂曜曰洛陽天  
下山河四險之固城池宮室無假營造可徙平陽都之

曜不從焚燒而去珍怒曰屠貉子豈有帝王之意乎

貉子

蜀關羽圍樊孫權遣將助之敕使莫速進遣主簿先致命於羽羽忿其淹遲又自己得于禁乃罵曰貉子爾敢如是樊城拔吾不能滅汝邪權聞之知其輕已為手書以謝羽許以自往

獬子

五代楚高郁沉毅有善謀治軍旅有佐命功楚王子希

聲忌其奢侈請罷其兵乃左遷行軍司馬郁謂所親曰  
獅子漸長能咋人矣吾將營西山而老焉希聲聞之甚  
怒遂害郁

### 三狗

魏曹真為大將軍以何晏丁謚鄧颺為尚書謚為人外  
似疎略而內多忌又其意輕多所忽略雖與晏颺同列  
而皆少之唯以勢屈于真真亦敬之言無不從于時謗  
書謂臺中有三狗二狗噬柴不可當一狗憑默作疽囊



三狗謂何鄧丁也默者爽小字也其意言三狗皆欲噬人而謚尤甚也

庸狗

後漢董卓初與呂布誓為父子甚愛信之卓自知凶恣每懷猜畏行止常以布自衛後王允結布圖卓入朝騎都尉李肅以戟刺之卓衷甲不入傷臂墮車顧布大呼曰呂布何在布曰有詔討賊臣卓大怒曰庸狗敢如是耶布應聲持矛刺卓趣兵斬之

死狗

吳諸葛恪圍合肥新城城中遣士劉整出圍傳消息為賊所得考問所歷語整曰諸葛公欲活汝汝可具服整罵曰死狗此何言也我當必死為魏國鬼不苟求活遂汝去也欲殺我者便速殺之終無他辭至明帝時追賜爵關內侯

吳狗

晉將毛晃者為吳將陶璜所獲晃不為屈璜怒面詰之

曰晉賊吳厲聲曰吳狗何等為賊吳人殺之

狗鼠

唐宇文融方進用事中書令張說素惡之融每建白說輒引大體廷爭融揣說不喜欲先事中傷之張九齡謂說曰融新用事辨給多詐公不可以忍說曰狗鼠何能為尋為融所譖罷相

戲鼠猫兒

唐黃門侍郎盧懷慎好視地左拾遺魏光乘目為戲鼠

貓兒

失窟老鼠

唐蘇徵任汜水縣令舉止輕薄郎中張元一目為失窟老鼠一云失孔老鼠

鼠子

六則

漢宗室敞為廬江都尉歲餘遭旱行縣人持枯稻自言稻皆枯吏強責租敞曰太守事也載枯稻至太守所酒數行以語太守太守曰無有敞以枯稻視之太守曰都

尉事也。敝怒叱太守曰：「鼠子何敢爾！」刺史舉奏王莽徵到長安，免就國。

後漢胡文才，楊整脩，皆涼州人。司徒王允素所不善也。及李傕之叛，允乃召文才、整脩，使東曉諭之，不假借以溫顏。謂曰：「關東鼠子亦何為乎？卿往曉之。」於是二人往，實召兵而還。

魏遼東太守公孫淵遣使稱藩於吳。孫權遣太常張彌等將兵萬人，九錫備物，乘海授淵。舉朝大臣諫以淵未

可信而寵待太厚淵果斬彌等送於魏沒其兵資權大  
怒曰朕年六十世事難易靡所不嘗近為鼠子所前却  
令人氣踊如山不自截鼠之頭以擲於海無顏復臨萬  
國就令顛沛不以為恨尚書僕射薛綜等切諫乃止

晉郗超字嘉賓愔之子也少卓犖不羈有曠世之度凡  
所交友皆一時秀美死之日貴賤操筆為誄者四十餘  
人其為衆所宗貴如此王獻之兄弟自超未亡見愔常  
躡履問訊甚修舅甥之禮及超亡見愔慢怠履而候之

命席便遷延辭遜惜每慨然曰使嘉賓不死鼠子敢爾邪

前趙劉聰將起鷄儀殿於後庭陳元達諫聰怒曰吾為萬幾主將營一殿豈問汝鼠子乎將斬之元達叫曰臣下言者社稷計也劉后在後宮密以手䟽救之乃解

前秦姚弋少以膽勇稱常攘袂有言丈夫若遭魏太祖不封萬戶侯位上將者非丈夫也時類多笑之弋曰汝鼠子輩安知君子豹變之志乎後起平原豹為十八騎

之雄

鼠輩

魏華佗善醫太祖召華佗常在左右佗本作士人以醫見業意常自悔久遠家思歸到家辭以妻病太祖累書不至大怒檢知其詳付獄考驗首服荀彧請曰佗術實工人命所懸宜含宥之太祖曰不憂天下當無此鼠輩耶遂考竟佗

逆流蝦蟆



唐郎中張元一性滑稽有口才喜題目人而已腹臃脚短項縮眼跌吉相國目為逆流蝦蟆

飽水蝦蟆

唐魏光乘目黃門侍郎李廣為飽水蝦蟆坐此品題朝士自左拾遺貶新州新興縣尉

媼

唐禮部尚書祝欽明頗涉經史不閑時務魁碩肥腴頑滯多疑臺中小吏號為媼媼者秦穆公時野人所得肉

塊而無七竅

蛇虺嗔

隋庫狄士仁為貝州刺史發摘姦諂長吏尺布斗米之  
贓無所寬貸得千人悉配防嶺南司馬韋焜清河令趙  
達二人並苛刻惟長史有惠政時人語曰刺史羅剎政  
司馬蛇虺嗔長史含笑判清河生喫人

雙鳳連飛

北齊崔陵與弟仲文並有文學時陵為侍中仲文為銀

青光祿大夫同日受拜時云雙鳳連飛

鳳翔龍飛

晉何邵王濟俱為侍中傳咸贈詩曰吾兄既鳳翔王子亦龍飛邵乃咸之從內兄也

鳳雛

蜀龐統龐德公之從子德公謂統為鳳雛統少未有識者惟德公重之年十八使見司馬德操與語既而嘆曰德公誠知人也實盛德也

鳳之一毛

唐宇文融傳史臣曰宋璟裴耀卿許景先獲居重任因融薦之此亦鳳之一毛也

雙鸞

晉何邵王濟皆為侍中傳咸贈詩曰雙鸞遊蘭渚二離揚清暉注蘭渚喻中書也二離日月也

皂鵬

唐王志愔神龍中為左臺侍御史以剛鷙為治所居人

吏畏警呼為皂鵬所至破碎姦猾令行禁止境內肅然

楊鵬

偽蜀楊昭儉仕孟昶為御史中丞擊搏權貴正色當官  
時號楊鵬

南鵠北鷹

晉崔洪博陵安平人少以清勵顯名骨鯁不同於物武  
帝世為御史治中時長樂馮恢父為弘農太守愛少子  
淑以爵傳之恢父終服闋乃還鄉里結草為廬陽瘠不

能言淑得襲爵恢始仕為博士祭酒散騎常侍翟嬰薦  
恢高行邁俗洪奏恢不敦儒業嬰為浮華之目遂免嬰  
官朝廷憚之尋為尚書左丞時人語曰叢生荊刺來自  
博陵在南為鷄在北為鷹

### 王鷄子

五代蜀王建初圍陳敬瑄田令孜於成都有屠狗王鷄  
子者謂建曰請為公入城反間使敬瑄不備而吏民畏  
公上下不一未有不亡者也及暮造城下呼曰得罪于

行宮欲逃死可乎城中縋而入見敬瑄言建軍罷憊朝夕遁逃不足慮出告吏民稱神武兵勢強盛敬瑄不為備而人心危懼成都遂下

李鴉兒

二則

五代後唐李克用少驍勇善騎射軍中號曰李鴉兒黃巢陷京師克用舉兵赴難進屯乾坑巢驚曰鴉兒至矣京師平克用功第一

唐西川節度使陳敬瑄遣將以蜀兵戍興平數敗黃巢

軍賊號蜀兵為鴉兒每戰輒戒曰毋與鴉兒戰鬪僖宗  
實錄云巢衆以王師衣皂名為鴉兒

薄地鷁

五代蜀呂彥德驍勇善騎射常從王宗播宗壽征討寇  
牛革帽被漆甲跨烏馬執斫刺刀刃軍中目為薄地鷁  
鴈子都

五代梁鄆州朱瑾募其軍中勇者點雙鴈于其頰號鴈  
子都



白鸚鵡

唐韓偓與姚洎皆為翰林學士從昭宗幸岐偓每與兩  
敕使會棊兩使稍不勝洎即以手壞之偓呼為白鸚鵡  
如此者不一若洎不在坐兩使將輸必大呼白鸚鵡洎  
應聲而至即為壞局偓曰求知之道一何卑耶因撥局  
而起

原註白鸚鵡壞局事  
見明皇雜錄雪衣娘

赴蛇鵲雀

唐魏光乘任左拾遺題品朝士丞相姚元崇長大行急

目為赴蛇鵲雀坐此貶新州新興尉

鷺入鳳池

魯姓者為拾遺有武夫氣時人謂之外軍主帥張元一目為鷺入鳳池

霍亂禿臬

唐曲江令朱隨侯女夫李逖遊客爾朱九並姿相少媚廣州人號為三樵人歌曰奉敕追三樵隨侯道傍走迴頭語李郎喚取爾朱九隨侯舉止輕脫張鷺目為霍亂

秃臬

角鴟

北齊陸仁惠幽州刺史世號角鴟濟州長史李者翦嘗為  
主人朝士咸集仁惠不至翦先眇一目著作郎魏彥淵  
曰一目之羅豈能獲鳥以陸號角鴟故也

黃鸞

唐申王府長史崔恪趨權附勢之士也夔夔鼓聲即造  
形要直至夜號為黃鸞竟無所得

# 神鷄童

賈昌自言解鳥語音明皇喜鬪鷄養數千於鷄坊昌為  
五百小兒長加以忠厚謹密天子甚愛幸之金帛日至  
其家開元十三年籠鷄三百從封東嶽父忠死歸葬雍  
州縣官為葬喪車垂傳洛城道十四年三月衣鬪雞服  
會帝於溫泉時天下號為神鷄童時人為之語曰生兒  
不用識文字鬪鷄走馬勝讀書賈家小兒年十三昌盛  
榮華代不如能令金距期勝負白羅繡衫隨軟輦父死

長安千里外差夫持道挽喪車

何蟲豸

五代唐莊宗以盧程故唐時巨族命以為相人有假驢夫於程者帖興唐府給之府吏啟無例程怒笞吏背少尹任圜莊宗姊婿也詣程訴言不可程戴華陽巾衣鶴氅據几決事視圜罵曰爾何蟲豸恃婦家力也宰相取給州縣何為不可

欽定四庫全書

子部  
實賓錄卷十九

詳校官中書臣李彤

侍讀臣孫球覆勘

謄錄監生臣李光緒

欽定四庫全書

寶貨錄卷九

宋 馬永易 撰

神仙宗伯

唐道士王遠知父曇逸陳揚州刺史母梁氏嘗寢夢靈鳳集其身因而有娠又聞腹中啼聲沙門寶誌謂曇逸曰生子當為神仙宗伯神仙傳作王知遠

謫仙

三則

南齊永明中鍾山有人姓蔡不知名隱山中養鼠數十

頭呼來即來遣去即去言語狂易時人謂之謫仙

瑕邱仲甯人也賣藥於甯百餘年人以為壽已而地動舍壞死弟子取屍棄水中俄復見之人因謂之謫仙人唐李白字太白白之生母夢長庚星因以名之蘇頲為益州長史見白異之曰是子天才英特少益以學可比相如賀知章見其文嘆曰子謫仙人也又曰真太白星精白遊金陵與諸賢送權士序曰吾希風廣成蕩漾浮世受寶訣為三十六帝之外臣即四明逸老賀知章呼



之為謫仙人蓋實錄云

斥仙人

河東蒲坂有項曼都者入山學仙數年而歸家人問其故曼都曰有仙來迎乘龍升天帝前謁拜失儀見謫河

東號曼都為斥仙人

原註水經云有項寧都學道昇仙復還號曰斥仙人

王仙人

王可交華亭人耕釣自業居松江一日棹漁舟江行忽見花舫漾於中流有道士七人玉冠霞帔呼可交上船

命飲以酒樽中瀉之不出乃付以二粟食之甘脆異於  
常粟自後絕穀動靜若有神助挈妻子往明州賣藥使  
人沽酒錢但施人時言藥則壺公授酒則餘杭阿母相  
傳藥極去疾酒甚醉人明州里巷皆言王仙人藥酒世  
間不及道俗多圖其形像後入四明山不復出時有見  
者

天上神仙 地下神仙

新淦祥符觀道士何得一宣和間遊京師遇方士陶光

國愛其人物秀整語之曰當為辦一事姑亟歸無幾何  
徽宗夢人曰天上神仙鄭化基地下神仙何得一明日  
命閱祠部帳得諸新淦籍中化基其師也遽命召時得  
一方次郢州守貳禮請以往既對上大悅賜號冲妙大  
師主龍德太乙宮旋授丹林郎

以為仙人

則二

漢武帝東巡海上羣臣有言見一老父牽狗言吾欲見  
巨公忽不見漢武以為仙人

梁陶弘景善養生隱於句容之句曲山特愛松風亭院  
皆植松每聞其響欣然為樂有時獨遊泉石望見者以  
為仙人

地仙

則二

唐開元中有僵人在地下一千年因墓崩僵人復生不  
食五穀飲吸風露而已時人呼為地仙

五代張筠好聚財而喜施與秦民懷惠呼為佛子及罷  
官居洛第宅宏敞擁其貲以酒色聲妓自娛足者十餘

年人謂之地仙

水仙

二則

晉孫恩世奉五斗米道後為寇勢窮赴海自沉其黨謂之水仙

開元中唐陶峴彭澤之裔也家於崑山富有田業泛然江湖遍遊烟水恣意踈放不謀宦游製三舟備極堅巧一舟自載一舟載賓客一舟載飲饌有女樂一部逢奇遇興則慕其景物興盡而行吳越之士號為水仙

酒仙二  
則

唐王績為醉鄉記云阮嗣宗陶淵明等並遊於醉鄉沒身不返死葬其壤中國以為酒仙

唐杜子美酒中八仙歌詩云李白斗酒詩百篇長安市上酒家眠天子呼來不上船自稱臣是酒中仙

玄中法師

老子上三皇時為玄中法師三皇時為金剛帝君

精思法師

精思法師諱節周武帝嘗請受虛室五符赤書真文有  
白鶴臨壇褒回而去帝屢有錫賜復詔修真人之典遂  
撰精思法上覽仰歎再三因賜號精思法師俄改號玄  
中大法師

劉法師

劉法師不詳其名貞觀中居華陰靈臺觀鍊氣絕粒二  
十年每三元齋有一人衣縫掖衣貌陋而黔瘦居末座  
齋畢亦無言而去如此凡十餘年衣服顏色略不改法

師異而問之云余姓張名公弼住蓮花峯東北隅法師  
意彼火居試請同往公弼諾之行二十里援蘿攀葛崖  
谷險絕至一石壁高直一千餘仞下臨無底之谷一徑  
潤數寸惟側足而立公弼以指扣石壁劃然而開一門  
公弼引法師入中有人居公弼語其人曰師來此君具  
食其人取水一盃以肘後青囊中刀圭粉和之以飲法  
師其味甘且香俄法師告歸出門行數十步返顧但巨  
崖深壑而已自後公弼亦不復至



賢師

樂臣公善修黃帝老子之言顯聞於齊稱賢師

五斗米師

則二

後漢中平元年巴郡巫人張修療病愈者需米五斗號為五斗米師

後漢妖賊張角為五斗米師道使病者服罪家出米五斗以為常故號曰五斗米師

太平道師

後漢妖賊張修為太平道師持九節杖為符呪教病人叩頭思過因以符水飲之或自愈者則云此人信道其或不愈則云不信道

大賢良師

後漢末鉅鹿張角自稱大賢良師奉事黃老畜養弟子跪拜道過為符呪以水療病病者頗愈百姓信向之角因遣弟子八人使於四方以善道教化天下轉相誑惑十餘年間聚徒數十萬俄舉兵著黃巾為標幟時號黃

中亦名為蛾賊

程斬邪

上黨有程逸人者有符術唐劉悟為澤潞節度臨洛縣民蕭季平家甚富一日暴卒逸人嘗受季平厚惠聞其死馳傳視之語其子曰爾父未嘗死蓋為山神所召治之尚可活乃朱書一符向空擲之食頃果蘇曰今旦方起忽一綠衣人云霍山神召約行五十餘里適遇一丈人朱衣仗劍怒目從空而至謂季平曰程斬邪召可疾

去於是綠衣者懼而走朱衣人牽其袂偕來遂醒其家  
驚異因問逸人程斬邪誰曰吾學於師氏授我龍虎斬  
邪符錄因解其所佩錄二囊示之人方信其不誣後遊  
閩越不知所在

張山人

唐曹王貶衡州時有張山人伎術之士也王嘗出獵得  
鹿十頭圍已合失之不知其處召山人問之山人曰此  
是術者所隱耳遂索水以刀劒禁之俄於水中見一道

士長纜及寸負囊拄杖而行衆皆見之山人乃取布針就水中刺道士左足遂見跛足而行即告王曰此人易追止十數里遂令走馬向北逐之果見一道士跛足而行與水中者正同以王命邀之道士笑而來山人曰不可責怒但以禮求之王問道士鹿何在曰向見鹿即死故哀而隱之放在山側今亦可取王遣左右視之鹿皆隱於小坡而不動王問患足之由曰行數里忽爾病足王召山人與之相見乃舊相識焉其足尋愈乃是郴州

連山侯觀主即從容遣之

王山人

唐相國盧鈞初為尚書郎以病求出為筠州刺史到郡稍加羸瘠常獨坐山齋忽有一人敝衣踰垣而入詰其族氏及所由曰姓王山中來盧曰然則王山人也此來何以相教王曰公位極人臣而壽不永有沉繇之疾因出丹一粒曰服之五日疾當愈果如其言

二道士

五代江南陳濟尚書性疎簡喜賓客嘗有二道士一黃衣一白衣詣其家求假宿舍之廳事夜分聞二客床壞訇然有聲久之寂然秉燭視之見白衣人卧於壁下乃銀人也黃衣人不復見矣家由是富

### 世神

北齊和士開武成好握槊士開善此戲由是獲進加以傾巧便辟又能彈胡琵琶因致親寵嘗謂王曰殿下非天人也是天帝也王曰卿非世人也是世神也其深相

愛重如此

神人則二

晉淳于智字叔平有思義能易筮善厭勝之術上黨孔瑗家多喪貧苦或謂之曰淳于叔平神人也君何不就卜知禍所在瑗性質直不信卜筮曰人生有命豈卜筮所移會智來智為作卦卦成智謂瑗曰君安宅失宜故令君困君東北有大桑樹君至市入門數十步當有人持荆馬鞭者便就買以懸此樹三年當暴得財瑗承言



詣市果得馬鞭懸之三年後并得銅錢數十萬銅鐵器二十餘萬家於是贍疾者亦愈

長慶四年冬韓退之卧疾見一神人被甲仗劍長丈餘立於榻前曰吾有金革事將與卿圖之公曰願聞神人曰威粹骨絕國世與韓為仇今欲討之力又不足卿以為何如對曰臣願從大王討之神人領而去公歎曰是何祥耶凡數日窮其理不能究至冬公薨

神明

九則

後漢公沙穆為弘農令縣界有螟蟲食稼百姓惶懼穆乃設壇謝曰百姓有過罪穆之由請以身禱於是暴雨不終日而螟蟲自消百姓稱曰神明

後漢虞詡為朝歌令時有賊數千詡遣貧人能縫者傭作賊衣以綵線縫其裾為識有出市里者吏輒擒之

此按

則引虞詡事未全今據後漢書本傳補賊由是駭散稱為神明

梁顧憲之性清直為建康令時有盜牛者與本主爭牛各稱已物前後令莫能決憲之令解牛任其所去牛竟

還本宅盜者伏其罪時人號曰神明

齊傅琰為山陰令有賣鍼賣糖老姥爭團線來詣琰琰掛團線於柱鞭之密視有鐵屑乃罰賣糖者又二野父爭鷄琰各問何以食鷄一人云粟一人云豆破鷄得粟乃罰言豆者縣內稱神明無敢偷盜

隋薛胄為兗州刺史到官繫囚數百胄剖斷旬日便了囹圄虛空發奸擿伏時人號為神明

隋裴政為襄州總管妻子不之官受秩俸散給寮吏人

犯罪者陰悉知之或竟歲不發至再三犯乃因都會時  
於衆中召出親案其罪合境惶懾令行禁止稱為神明  
唐王鐔節度淮南嘗得無名書內韞中先有他書焚之  
人信為無名者異日因小罪并以所告窮驗以譎衆下  
以為神明

唐李栖筠肅宗時為吏部員外郎判南曹時大盜後選  
簿云舛多偽冒栖筠剖析有條吏氣奪號神明

唐崔碣為河南尹初有賈客王可久出商值亂不得歸

妻少且美北舍楊乾夫善卜以計誘取之悉有其產可  
久歸訴於官乾夫行賂尹不能辯反兩被刑可久雙背  
流血目為之枯碣掩乾夫鞠而斃之時久雨斷獄之日  
頓開霽人皆相慶號曰神明

以為神

七則

漢蘇武使匈奴單于欲降之幽武置大窖中絕不飲食  
天雨雪武卧齧雪與旃毛並咽之數日不死匈奴以為  
神

後漢耿恭以戊巳校尉為匈奴所逼壅絕澗水城中穿井十五丈不得水吏士渴乏笮馬糞汁飲之恭仰天歎曰昔貳師拔佩刀刺山飛泉湧出今漢德神明豈有窮哉整衣服向井再拜為吏士禱之有頃水泉奔出衆稱萬歲乃揚水示之虜以為神遂即引去

漢种億為畿令常有虎害人億令設陷得二虎億曰害人者低頭一虎乃低頭億命殺之其一虎放出自是虎皆出境不復為害人以為神

晉嵇康嘗採藥遊山澤會其得意忽焉忘反時有  
樵蘇者遇之咸以為神

唐李林甫每與祿山見祿山惕然不覺自罄折林甫與  
語揣其意迎割其端祿山大駭以為神每見雖盛冬必  
流汗林甫稍厚之

唐有杜生者善易占有亡奴者問所從往追杜生曰自  
北行逢使者懇丐其鞭若不可則以情告其人果值使  
者於道如生語使者異之曰去鞭吾無以進馬可折道

傍夢以代之其人往折夢其亡奴伏其下遂獲之他日  
又有亡奴者生戒曰可持錢五百伺於道見進鵲者可  
市其一必得奴俄而使至其人以情告使者以一與之  
忽飛集灌莽上往取之奴在其中人以為神

唐韓晉公在潤州夜與從事登萬歲樓酒方酣不悅語  
左右曰汝聽婦人哭乎當在何所對曰在某街詰朝命  
吏捕哭者訊之信宿獄不具吏懼罪守於屍側忽有大  
蠅集其首因發髻驗之婦果私於隣醉其夫而釘殺之



人以為神

新鬼 故鬼

魯文公二年秋八月大事于太廟躋僖公逆祀也於是夏父弗忌為宗伯尊僖公且明見曰吾見新鬼大故鬼小先大後小順也躋聖賢明也明順禮也君子以為失禮禮無不順祀國之大事而逆之可謂禮乎

趙鬼

齊東昏侯時應勅捉刀之徒並專國命人間謂之刀

卷九  
勅左右刀勅之徒悉號為鬼宮中謠云趙鬼食鴨齏諸鬼盡著調當時莫解梁武平建鄴東昏死羣小一時誅滅故稱為諸鬼也

鬼揶揄

晉襄陽羅友有才韻少時人多謂之癡始在桓溫府家貧乞祿溫雖以才學遇之謂其誕肆非治民材許而不與後同府有為郡者溫為赴別友亦被命至尤遲晚溫問之答曰出門中路遇一鬼揶揄曰公祇見汝送人

作郡何以不見人送汝作郡始怖終慚回還以解不覺成淹緩之罪溫雖笑其滑稽而心頗愧焉

夜叉羅刹

後魏元叉輔政凶暴宗室鄴王樹以書暴叉過惡言叉本名夜叉弟羅實名羅刹此鬼食人非遇黑風事同飄墮嗚呼魏境離此二灾昆季此名表能噬物

人頭羅刹鬼面夜叉

唐李全交為監察御史專以羅織酷虐為業臺中號

曰人頭羅刹殿中王汚號曰鬼面夜叉

按朝野僉載王汚作王旭

### 行方相

唐納言婁師德長大而黑一足蹇郎中張元一目為行方相又號衛靈公言防衛靈公柩也

### 牛頭阿婆

唐秋官侍郎周興當則天時為酷吏安忍殘賊法外若楚無所不至時號牛頭阿婆百姓怨謗興乃榜門判曰被告之人問皆稱枉斬決之後咸悉無言

李八伯

晉道士李脫妖術惑衆自言八伯歲故號李八伯自中州至建鄴以鬼道療病云

張子

南齊東昏侯時奄人王寶孫年十三四歲號為張子最有寵參預朝政

貳負臣

漢孝宣帝時擊磻石於山郡陷得石室其中有反縛

盜賊二人問之舉朝莫知諫議劉向言此貳負臣也詔問何以知之臣讀山海經以知其文曰貳負臣殺窶窳帝乃梏之䟽屬山桎其右足反縛兩手向又云令七歲女乳湮塗其口必能言果信然矣

伯表

酒泉郡每太守到官無幾輒卒後渤海陳斐授此郡將行憂懼召卜者占之卜者曰遠諸侯放伯表則無害斐不解其語卜者曰君去自當解之既到官侍醫

有張侯直醫有王侯卒有董侯史侯斐心悟曰此謂諸  
侯乃遠之然不曉伯裘之義後夜半有物來斐被上便  
以被冒取之物跳踉訇訇作聲欲殺之鬼曰我實無惡  
意府君能赦我當深相報斐曰爾何物曰我千歲狐也  
字伯裘若府君有急難當呼我字斐乃悟放之明日夜  
半擊戶曰我伯裘也來白事北界有賊驗之果然後諸  
侯謀殺斐亦賴伯裘得免其卜驗如此

竹王

漢武時有竹王嘗從人止大石上命作羹從者白無水  
王以劒擊石出水今竹王水是也

茶仙

唐杜牧為池州刺史春日茶山病不飲酒作詩呈賓客  
曰笙歌登畫船十日清明前山秀白雲膩溪光紅粉鮮  
欲開未開花半陰半晴天誰知病太守猶得作茶仙

針神

魏秦朗其母杜氏為太祖所納朗隨母蓄于公宮為帝



製衣服宮中號為針神朗後至騎將軍

花精

五代吳越錢仁傑忠懿王之從兄也酷好種花人號花精云

壺公

二則

真人謝元號壺公初汝南費長房為市掾忽見公從遠方來賣藥人莫識之藥無二價所治百病皆愈常懸一壺於屋上日入之後公輒蹶入人無見者惟長房於樓

上見之知非常人乃逐日身自掃除拜進餅公受餅而不謝如此積久一日見召長房入壺中授以主鬼治病之道法長房百歲而卒今為地下主者

施存魯人也夫子弟子學大丹之道三百年十鍊不成惟得變化之術後遇張申為雲臺治官嘗懸一壺如五升器大變化為天地中有日月如世間晝夜夜宿於內號壺天人謂壺公因之得道也

粥飯僧

五代李愚為人謹重寡言仕唐為相時兵革方興天下多事而愚欲依古以創理乃請頒唐六典示百官使各舉其職州縣貢士作鄉飲酒禮時以其迂闊不用愍帝即位有意於治數召學士問以時事以愚所建白為迂未嘗有所問廢帝亦謂愚等無所事嘗目宰相曰此粥飯僧耳以其飽食終日無所用心也

顧和尚

五代吳越顧全武餘姚人少嘗為僧博通外學機警有

才畧錢鏐每延接與語甚器之辟令從戎以為裨將軍  
中號曰頤和尚征討有功嘗圍淮將秦裴於崑山裴援  
絕不降全武自為長檄以諭裴封書納款全武喜召諸  
將觀之發函乃佛經一卷蓋以全武嘗為僧也諸將失  
色全武大喜曰爾不憂死何暇相詭也及裴降乃為言  
鏐卒全活之時稱長者

欽定四庫全書

實賓錄卷十

宋 馬永易 撰

負局先生

負局先生不知何許人語似燕代人循吳市中街磨鏡  
取一文輒問主人得無疾苦否若有輒出紫色丸藥與  
之莫不愈

荷篠丈人

荷篠丈人隱人也見周室衰諸侯政亂遂乃隱身不仕

老人以杖荷蓀器而行自匿姓名故曰荷蓀丈人

### 賣藥翁

賣藥翁莫知其姓名人或詰之曰此真姓名也有自童稚見之迨乎暮齒顏貌不改嘗提一大葫蘆賣藥人以疾苦求藥得錢不得錢悉與之無不神效或戲問之有大還丹賣否曰有一粒厥直千緡人皆笑之以為風狂後於長安賣藥其葫蘆已空只餘一丸大者而安掌中曰百年賣藥凡億兆人無一人買者深可哀哉深可

哀哉今當自喫藥方入口足下五色雲生騰空而去也

端箭師

唐修文學士馬吉甫眇一目郎中張元一目為端箭師

擣蒜老

後唐安重霸任京兆尹先是蔡雖之間令長設酒食私  
丐於部民者俗謂之擣蒜及重霸之鎮長安亦為之故  
秦人目重霸為擣蒜老

吹醋漢

唐郎中張鴻子視望傷目郎中張元一目為眈醋漢

短智漢

唐則天禁屠殺吏人艱於蔬菜婁師德為御史大夫因  
使至陝厨人進肉師德曰勅禁屠殺何為有此厨人曰  
豺咬殺羊遂有之師德曰大解事豺食之又進鱠復問  
厨人復云豺咬殺魚師德云短智漢何不道是獺咬殺  
魚厨人即云是獺師德亦為薦之

長生人



晉末孫恩據會稽山號征東將軍號其黨曰長生人

赤松公

赤松公不知其名姓服麋角丸彭祖弟子得仙者也

白石生

白石生彭祖之時已三千餘歲斷穀入山常煮白石為糧就白石居故時人號曰白石生今為東方左仙卿

蕭四繳

南齊長沙威王晃高帝第四子也少有武力為帝所愛

初沈攸之事起見多從武容赫奕都街時人爲之語曰  
煥煥蕭四繖武帝幸鍾山見從駕以馬槊刺道傍枯蘗  
上令左右數人引之銀纏皆卷聚而槊不出見復馳馬  
拔之應手便去

武一谷

五代漢武行德初樵采爲業而氣雄力壯一谷之薪可  
以盡負鄉里謂之武一谷後仕高祖爲節度使云

潘鋤脚

潘環事晉為宿州刺史有牙將微過環給言咎之牙校托一尼致鍬脚銀兩銚求贖怒曰鍬本幾脚曰三脚環曰今兩能為鍬乎尼笑為足其數時人目為潘鍬脚

丁滅門

五代丁從貴為常州刺史苛刑暴名謂之丁滅門後為吳越武肅王所戮

欒公社

漢欒布為燕相稱曰窮困不能辱身非人也富貴不能

快意非賢也於是常有德厚報之有怨必以法滅之燕  
齊之間皆為立社號曰樂公社

按立社誤作立廟樂公  
下缺社字今據漢書改

補

### 葉君祠

後漢王喬顯宗世為葉令喬有神仙術後天下玉棺於  
堂前吏民推排終不搖動喬曰天帝召我耶乃沐浴服  
飾寢棺中蓋便立覆葬於城東土自成墳其夕縣中牛  
皆流汗喘乏而人無知者百姓乃為立廟號葉君祠

鄭公風

會稽記曰射的山南有白鶴為仙人取箭漢太尉鄭弘嘗採薪得一遺箭頃之有人覓箭見弘還之問弘曰何所欲弘識其神人也曰常患若耶溪載薪為難願旦南風暮北風後果然故若耶溪風至今猶然呼為鄭公風

鄭君池

唐張龍公為宣城令嘗體冷且濕夫人石氏異而詢之公曰吾龍也夢人鄭祥遠亦龍也據吾池自謂鄭君池

吾屢與戰未勝明日取決可令吾子挾弓矢射之

李公騎

元魏李瑒隨蕭寶夤西征為統軍瑒德洽鄉里招募  
雄勇其樂從者數百騎瑒傾家振恤故其下每有戰功  
軍中號曰李公騎

孝子石

蜀犍道縣江水有孝子石昔縣人有隗叔通性至孝為  
母汲江脅水天為出平石至江脅中今猶謂之孝子石

其孝感有如此云

白帝倉

後漢公孫述據成都自立為天子號成家色尚白又謂  
五德之運黃承赤而白繼黃金據西方為白德而代王  
氏得其正序成都郭外有秦時舊倉述改名白帝倉  
云

王鐵槍

五代梁王彥章為人驍勇能跣足履棘行百步持一

鐵槍騎而馳突奮疾如飛而他人莫能舉也軍中號王鐵槍

文大劍

五代蜀王宗阮本姓文名武堅毅沉厚好賓客善撫士卒能用闊劍軍中號為文大劍云

潘大劍

五代楚將軍潘璋持二十斤劍出入軍陣中謂之潘大劍狀偉善食啖嘗率兵救韶州嶺南兵聞璋至開城



一面以避其鋒後為連州刺史

張神劔

五代吳張融始為羣盜以善劔號張神劔

寶劔

則二

後漢周乘字子居陳仲舉嘗歎曰若周子居者真治國之器譬之寶劔則世之干將

宋臨川王義慶幼為武帝所知曰此我豐城寶劔也

水鏡

蜀司馬德操年少龐德公十歲兄事之世謂為水鏡

鐵條

唐王重榮始為河中牙將兩逐其將破黃巢有功時號為鐵條言其剛也

陳鐵

五代南唐陳誨生期月足勁能履父母異之小字阿鐵為人勇敢足膂力為都裨將累有戰功至節度使軍中壯之呼為陳鐵

來嚼鐵

唐來瑱畧知尚名節崖然有大志安祿山反拜潁川太守賊攻潁川方積粟多瑱完埤自如手射賊皆應弦仆賊使降將軍思琛招之瑱不應前後俘殺甚衆賊懼目為來嚼鐵

四軍紫

唐貞元末有郎中四人自行軍司馬賜紫而登郎署省中謔為四軍紫

一條葛

五代葛從周有殊功鎮青州人語曰山東一條葛無事

莫撩撥

萬頃波

宋王惠與謝靈運嘗得交言靈運辨博辭義鋒起惠時然後言時荀伯子在坐退而告人曰靈運固自蕭散直上王郎有如萬頃波焉

烟燠地木

唐殿中侍御史王旭短而黑左拾遺魏光乘目為烟燠地木

中霜穀束

唐則天革命貝州舉人趙廓眇小起家監察御史時人謂之臺穢李昭德嘗之為中霜穀束

卞田居 傅蠶室

齊卞彬為車騎記室性好飲酒以瓠壺瓢杓杭皮為肴着帛冠十二年不改易以大瓠為火籠什物諸多詭異

自稱卞田居婦為傅蠶室

談天衍 雕龍奭 災穀過髡

齊鄒衍為書十餘萬言其語闕大不經騶奭亦頗采衍之術以紀文淳于髡久與處時有得善言故齊人頌曰談天衍雕龍奭災穀過髡注云劉向別錄曰過字作輶輶者車之盛膏器也災之雖盡如脂膏之有深潤也

腰鼓兄弟

南齊沈冲涉獵文義永明四年為五兵尚書與兄淡深

名譽有優劣世號為腰鼓兄弟並歷御史中丞兄弟三人皆為司直後並歷侍中冲位五兵尚書

青精先生

青精先生年千歲色如童子步日過五百里能終歲不食亦能一日九食

鹿皮公

鹿皮公淄川人少為府小史才巧舉手成器岑山上有神泉人不能到小史白府君請木工斤斧三十人作轉

輪造縣閣意思橫生數十日梯道成上其嶺作祠屋留止其旁食芝草飲神泉七十餘年溜水未出時下呼宗族得六十餘人命上山半水出盡漂一郡沒者萬計小史辭遣宗室令下山著鹿皮升閣而去

七松處士

唐鄭薰性友愛而端勁再知禮部舉引寒畯士類多之既老號所居為隱巖時松于庭號七松處士

菰蘆中偉人



南唐查文徽歙州休寧人好學善談兵任俠尚義初以策干李主與語奇之謂宋齊邱曰菰蘆中偉人也命事知諤於潤州知諤有玉杯直百萬行酒至文徽前墮地而毀衆皆駭愕文徽容色如故

### 凌霄花

唐馮慈明為李密所拘逼授偽官慈明知天命有歸勸密密怒囚之數月食藁薦而死神龍中勅旌其門為忠臣令大標其題見之者莫不歎美崔明號為凌霄花亦

士林之美稱也

杞梓

四則

晉袁宏三國名臣贊曰赫赫三雄並回乾軸競取杞梓爭收松竹鳳不及棲龍不暇伏

晉二陸制曰陸機陸雲寔荆衡之杞梓挺珪璋於秀實馳英華於早年

梁庾城沉靜有名鄉曲文帝為郢州辟為主簿歎其美材曰荆南杞梓其在茲乎

後周唐瑾柳敏論曰瑾敏挺杞梓之材

瓊厨金穴

郭況光武皇后弟也累金數億家童四百餘人里語曰  
洛陽多錢郭氏室夜月晝星富無匹其寵者皆以玉器  
盛食故東京謂郭氏瓊厨金穴

錦繡堆

唐謝延皓大順中以詞賦得名與徐寅不相上下時號  
錦繡堆

藍田生玉

吳諸葛恪瑾長子也少有才名發藻岐疑辨論應機孫權見而奇之謂瑾曰藍田生玉真不虛也

珠玉在旁

北齊劉緯五子並有志行璿璣聰敏機悟美姿儀皆為其舅北海王所愛曰可謂珠玉在旁覺我形穢

南金

五則

晉薛兼與紀瞻閔鴻顧榮賀循齊名號為五雋初入

洛司空張華見而奇之曰皆南金也又贊曰顧紀賀薛並南金東箭委質霸朝望重搢紳宦成名立

晉顧榮上言中宗曰陸士光貞正清貴金玉其質甘季思忠款盡誠膽幹殊決殷慶元質畧有明規文武可施用榮族兄公讓明亮守節因不易操會稽楊彥明謝行言皆服膺儒教足為公望賀生沉潜青雲之士陶恭兄弟才幹雖少寔事極佳凡此諸人皆南金也書奏皆納之晉顧衆虞潭贊曰顧寔南金虞惟東箭

梁張率寬雅能屬文與同郡陸厥幼相友狎嘗同載詣左衛將軍沈約遇任昉在焉約謂昉曰此二子後進才秀皆南金也卿可識之由此為昉友矣

陳虞世基博學高才兼善草隸陳中書令孔奐見而嘆曰南金之貴屬斯人

桂林一枝 崑山片玉

晉郗詵字廣基博學多才瓌瑋倜儻泰始中詔天下舉賢良直言之士詵應選為第一武帝於東堂會送問

詵曰卿自以為何如詵對曰臣舉賢良對策為天下第一猶桂林之一枝崑山之片玉帝笑侍中奏免詵官帝曰吾與之戲耳

荒萊特苗 鹵田善秀

晉楊方字公回好學有異才初為郡鈴下威儀公事之暇輒讀五經鄉邑未之知內史諸葛恢見而奇之嘗遣方為文薦郡功曹主簿虞預稱美之送以示賀循循報書曰世衰道喪人物凋弊每聞一介之徒有向道之志

冀之願之如方者乃荒萊之特苗鹵田之善秀資質已良但沾染未足耳移植豐壤必成嘉穀

瑶林植庭 雪羽馴廡

唐崔祐甫為穆氏四子講塾記曰利州刺史穆寧正直登朝嚴明作牧有四子曰贊質賡賞聳秀之資若瑶林植庭雪羽馴廡

軒冕龍門 膏粱宗匠

晉范甯篤學多通時以浮虛相扇儒雅日替甯以為其



源始於王弼何晏二人之罪深於桀紂乃著論曰或曰  
平叔神懷超絕輔嗣妙思通微振千載之頽網落周孔  
之塵網斯蓋軒冕之龍門膏梁之宗匠夫子以為罪過  
桀紂何哉答曰王何蔑棄典文不遵禮度遊辭浮說波  
蕩後生桀紂暴虐止足以滅身覆國豈能回百姓之視  
聽哉

金閨衆彥 蘭臺羣英

江文通別賦云金閨之衆彥蘭臺之羣英注金閨金馬

金史卷之八  
門也公孫弘等待詔於此傳韶班固等為蘭臺令史

文章司命 人物權衡

唐李白上韓荊州朝宗書曰君侯制作侔神明德行動  
天地筆參造化學究天人幸願開張心顏不以長揖見  
拒必若接之以高宴縱之以清談請日試萬言倚馬可  
待今天下以君侯為文章之司命人物之權衡一經品  
題便作佳士而今君侯何惜堦前盈尺之地不使白揚  
眉吐氣激昂清霄也

達禮之宗 儒林之亞

梁任昉王文憲集序曰賀生達禮之宗蔡公儒林之亞  
注云賀循博覽羣書尤明三禮為江東儒宗蔡謨以  
儒雅稱

決定嫌疑 視表見裏

北齊宋世軌幼自修整好法律遷廷尉少卿有能名時  
大理正蘇珍之以才幹名寺中語曰決定嫌疑蘇珍之  
視表見裏宋世軌

國珍

柳公權嘗於佛寺看朱審畫山水手題壁詩曰朱審偏  
能視夕嵐洞邊深墨寫秋潭與君一顧西牆畫從此看  
山不向南此句衆歌詠後公權為李聰夏州掌記因奏  
事穆宗召對曰我於佛寺見卿筆劄思見卿久矣宣出  
充侍書學士非時宰所樂進擬左金吾衛兵曹充職御  
筆改右少諫中外朝臣皆呼為國珍

國楨

元宗登封泰山劉晏始八歲獻頌行在帝奇其幼命宰相張說試之說曰國楨也即授太子正字

### 家寶

唐李貽孫為歐陽詹文集序曰歐陽君生於閩之里幼為童孩時即不與衆童親狎行止多自處年十歲許每見山濱江畔有少景可探心獨娛之常執一軸忘歸於其間逮風月清暉或暮而尚留宵不能釋不自知所由蓋其性之所多也未甚識文字隨人而問章句忽有一



言契於心移日自得長吟高嘯不知其止也父母不識其志嘗謂里人曰此男子未知其旨何如要恐不為汨沒之餓氓也未知吉邪凶邪鄉人有覽事多而熟於聞見者皆賀之曰若此子家寶也柰何慮之邪

楷模三則

後漢盧植通古今楷模後學曹操稱之曰名著海內學為儒宗士之楷模國之楨幹也

北齊邢邵字子才史臣曰子才少有盛名鼓動京洛文

宗少府獨秀當年舉必任真情無文飾智畧疎通罕見  
其人足為一代之楷模也

隋李德林為吏部郎陸昇嘗命其子與德林周旋誠  
之曰汝每事宜師此人為楷模

### 冠冕

隋柳願言為晉王諮議叅軍招才學之士諸葛穎虞世  
南等以充學士而願言為之冠冕王以師友處之

### 天下楷模

漢李膺字元禮時郭林宗等更相褒重學中語曰天下楷模李元禮

海內冠冕

則二

梁王暕七葉重光海內冠冕

梁任昉為王儉集云晉中興以來六代名德為海內冠冕

遺愛

則二

晉袁宏三國名臣贊曰孔明盤桓待時而動遐想管樂



遠明風流治國以禮民無怨聲刑罰不濫後有餘力雖古之遺愛何以加茲

梁任昉為王儉集序曰沒世遺愛古之益友

按遺愛始孔子稱子

產語見左傳  
附記於此

### 當時談宗

晉阮修好易老善清言王衍當時談宗自以論易畧盡然有所未了研之終莫悟每云不知比後當見能通者否衍族子敦謂衍曰阮子可與言衍曰吾亦聞之但未

知其疊疊之處定何如爾及與修談言寡而旨暢衍乃嘆服焉

後來領袖

二則

何昌寓少而清靜獨立不羣王儉謂之曰後來領袖方幹於朝者其在於卿乎答曰不意明公謬顧不重

梁任昉為蕭揚州薦王暕表曰竊見秘書郎王暕神氣清茂允迪中和叔寶理遣之談彥輔名教之樂故以暕映先達領袖後進

後生準的

梁公休源舉秀才太尉徐孝嗣見其策深喜之謂同座曰董仲舒華令思何以尚此可謂後生準的也

後進之冠

後漢陳遵少與張竦伯松俱為京兆史竦博學通達以廉儉自守而遵放縱不拘操行雖異然相親友哀帝之末俱著名字為後進之冠並入公府

舊德老成

晉何曾進位太傅曾以年老屢乞遜位詔曰太傅明爽高亮執心洪毅可謂舊德老成國之宗臣也

人物宗主

李神俊名挺隴西人少仕京洛以才學器調著名鄭伯猷曰舅舅是人物宗主

獎鑑人倫

後漢郭泰字林宗舉有道不就善人倫鑒范滂稱泰隱不違親貞不絕俗其卒也同志者共刻石立碑蔡邕

為其文既而謂涿郡盧植曰吾為碑銘多矣皆有慙德  
惟有道無愧色爾史贊曰郭有道獎鑒人倫

為世吏表

魏薛悌為魏郡太守及尚書令並悉忠練事為世吏表  
言談林藪

晉裴頠樂廣嘗與之清言欲以理服之而頠辭論豐博  
廣笑而不言時人謂頠為言談之林藪

大丈夫格

吳潘濬陸凱業肩評曰潘濬公清割斷陸凱忠壯質直  
皆節槩梗梗有大丈夫格業肩身潔事濟著稱南士可  
謂良牧矣

小者佳

晉王獻之嘗與兄徽之操之俱詣謝安二兄多言俗事  
獻之寒溫而已既出客問王氏兄弟優劣安曰小者佳  
客問其故安曰古人之辭寡以其少言故知之

按世說  
註中興

書云徽之義之第五子又王氏譜云操之義之第六子  
此書云義之與兄徽之操之詣謝安義當是獻字之誤

今改正  
附辨

保家主  
三則

襄公二十七年鄭七子賦詩印段賦蟋蟀趙孟曰善哉  
保家之主也吾有望矣注云蟋蟀曰無已太康職思其  
居好樂無荒良士瞿瞿言能戒懼

魏韋誕字仲將孔融稱之曰仲將懿性貞實文敏篤誠  
保家之主也

晉曹志魏陳思王植之孽子也少好學以才行稱夷簡

有大度兼善騎植曰此保家主也立以為嗣

